

四庫全書

史部

欽定四庫全書

五代會要卷九

宋 王溥 撰

喪葬下

後唐長興二年十二月二十六日御史臺奏先奉勅前
守亳州譙縣主簿盧茂謙進策內已事竊見京城內偶
遭凶喪者身不居於爵祿葬有碍於條疏須使輓甲車
殯送者事雖該於往制勅已著於前文或值炎鬱所拘

偶緣留駐利便須期於時日貧窮旋俟於告投停日既多塋園又遠伏乞特付所司別令詳定權免驚甲車送葬者奉勅送葬之儀雖防越制令文之設亦許便時其或候歷炎天喪從遠日停留既久遷送有期車中便苦於撼搖陌上可量於凶穢人情所病物議僉同宜在酌中庶成惻隱應喪葬自五品以下至庶人自春夏秋宜並許第等置輦其餘儀或一切仍舊兼喪車亦不全廢如要令陳於室輦之前其輦大小制度及結絡遮蔽所

使匹帛顏色並擊舁人數次第仍令御史臺詳核據品秩等級士庶高低各定規制施行兼定城內舊制比無居人近日許人戶逐便居止或有喪死旋須遷送其出時並舁遣次第亦可穩便制置務在得宜者今臺司准勅追到兩市葬作行人白望李温等四十七人責得狀稱一件於梁開平年中應京城海例不以高例及庶人使錦繡車輦並是行人自將狀於臺巡判押一件於同光三年中有勅著斷錦繡祗使常式素車輦其輦稍有力

百姓之家十二人至八人，輿車虛喪車小輦子不定，人數或是貧下四人至兩人，迴使素紫白絹帶額遮幃，輦上使白粉帚木珠節子上使白絲其引輿車小輦子使結麻網幕，後至天成三年中有勅條流庶人，斷使輦祇令別制造驚甲車，載亦是紫曲素物，至今令內見使者令臺司按葬作行人李溫等通到狀，并於令內及天成四年六月勅內詳穩便喪置定例，五品至八品升朝官六品至九品不升朝官等及庶人喪葬儀制，謹具逐件。

如後

五品至六品升朝官使二十人舁輦車竿高七尺長一丈三尺濶五尺以白絹全幅爲幃額婦人以紫絹爲帶額並畫雲氣周迴遮蔽上安白粉掃木珠節子二十道輓車一小香輦子一並使結麻網幕魁頭車一輓歌八人練布深衣披引鐸翳各一不得着錦繡明器三十事四神十二時在內四神不得過一尺餘不得過七寸園宅一方三尺其明器物不得以金銀毛髮裝飾共置八輦

內許兩箇纪蘿已上並不得使結絡錦繡裝飾如事力
不辦任自取便

七品至八品升朝官使一十六人舁輦車竿高七尺長
一丈三尺濶五尺以白絹全幅爲帶額婦人以紫絹全
幅爲帶額周迴遮蔽上安白粉掃木珠節子二十道寬
車香輦子各一並使結麻網幕魁頭車一明器二十事
以木爲之四神十二時在內四神不得過一尺餘不得
過七寸及不得使金銀鏤雕帖毛髮裝飾園宅一方二

尺五寸共置六舁輓歌一十六人練衣深衣披引鐸翳
各一已上並不得著錦繡結絡裝飾如事力不辦任從
所便六品至九品不升朝官使一十二人舁輦車竿高
六尺長一丈一尺濶四尺以白絹全幅爲帶額婦人以
紫絹爲帶額周迴遮蔽上安白粉掃木爲珠節子一十
六道輓車一香輦子一並使麻網幕明器以一十五事
並不得過七寸以木爲之並不得使金銀雕鏤帖毛髮
裝飾共置五輦輓歌四人練布深衣鐸翳各一不得著

錦繡及別有結絡裝飾如事力不辦任自取便檢校兼
試官並依此例庶人使八人舁輦車竿高五尺五寸長
一丈濶四尺男子以白絹半幅爲帶額婦人以紫絹半
幅爲帶額周迴遮蔽輿車一香輦子一使結麻網幕明
器一十四事以木爲之不得過五寸共置五輦車不得
使紗籠金銀帖毛髮裝飾除此外已上不得使結絡錦
繡等物色如入戶事力不辦八人以上任自取其喪
輦車已准勅不全廢任陳靈輦之前者已上每有喪葬

行人具所供行李單狀申知臺巡不使別給判狀如所
供賃不依狀內及踰越制度仍委兩巡御史勅驅使官
與金吾司并門司所由同知覺察如有違犯追勘行人
請依天成二年六月三十日勅文行人徒二年喪葬之
家即不問罪者

皇城之內近已降勅命指揮每有喪葬以色服蓋身出
城外任自隨便如迴來不得立引嵬幡子却著孝衣入
皇城内者今請再降勅命指揮皇城内此後每有人戶

喪葬令至晚靜後取便出門不得取內外諸色趨朝官
右謹具定到五品至八品升朝官六品至九品不升朝
官及檢校兼試官并庶人喪葬儀制如右奉勅宜依四
年三月二十五日御史中丞龍敏奏京城士庶喪葬近
有起請條流臣等參詳恐未允當伏見天成二年勅內
品節分明凡有喪葬行人須凜定規據其官秩高卑合
使人數物色先經本巡使判狀自後別有更改不令巡
使判狀祇遣行人具其則例申臺巡今欲却勒行人依

舊先經兩巡使判狀其品秩物色定制不得輒違別欲
指揮行人於喪葬之家除已得本分工價錢外保無內
邀准乞覓文狀送到臺巡如有改違必加懲責勅從之
廣順元年三月勅今後藩侯帶平章事以上薨謝者差
官撰神道碑文宣示未帶平章事及刺史准令式合立
碑者其文任自製撰不在奏聞限

以故忠武軍節度使
孟頴男道右上章乞

立其文碑
故有是勅

清泰二年十月中書門下奏奉長興二年四月五日勅

朝臣居喪終制委御史臺具名申奏諸道幕府職事除喪後宜行恩命州縣官纔使授官及到任一考前丁憂服闋並與除授依常定格自有節文應州縣官新授及到任一考後丁憂服闋准格取文解南曹磨勘申中書門下當與除授不得經堂陳狀從之

周廣順三年十一月勅應内外文武臣寮幕職州縣官舉選人等今後有父母亡歿未經遷葬其主家之長不得輒求仕進所由司亦不得申舉解送如是卑幼在下

者不在此限其合赴舉選者或是葬事禮畢或是甲幼
在下勒於所納家狀內具言不得調冒宜令御史臺巡
及逐處長吏本司長官所由司覺察糾舉犯者必行典
法如是不切覺察縱任進冒罪在糾舉之司其中有兵
革阻縮或是朝廷特恩除拜起復追徵及內外管軍職
員並不拘此例所有勅前現任職官及今年舉選人不
在糾舉之限

奪情

後唐應順元年閏正月十六日勅凡在苴麻並須終制
比緣金草遂有奪情示以移忠藉其陳力其內諸司使
副帶西班正官者宜候過卒哭起復授官不帶正官者
及供奉官殿直承旨等宜過卒哭休日赴職其有帶承
班官者祇以檢校官充職服闋日加授前職

定格令

梁開平三年十月勅太常卿李燕御史司憲肅頃中書
舍人張袞尚書戶部侍郎崔沂大理寺卿王鄴尚書刑

部郎中崔誥共刪定律令格式至四年十二月中書門
下奏新刑定令三十卷式二十卷格一十卷律并目錄
一十三卷律疏三十卷共一百三卷請目爲大梁新定
格式律令頒下施行從之

後唐同光三年六月刑部尚書盧質上新集同光刑律
統類十三卷天成元年九月二十八日御史大夫李琪
奏奉八月二十八日勅以大理寺所奏管見四部法書
內有開元格一卷開成格一十一卷故大理卿楊邁所

奏行偽梁格并目錄一十一卷與開成格微有舛誤未審祇依楊邁先奏施行為復別頒聖旨令臣等重加商較刊定奏聞者今莫若廢偽梁之新格行本朝之舊章遵而守之違者抵罪至其年十月二十一日御史臺刑部大理寺奏奉九月二十八日勅宜依李琪所奏廢偽梁格施行本朝格令者伏詳勅命未該律令伏以開元朝與開成隔越七帝年代既深法制多異且有重輕律无二等若將兩朝格文並行伏慮重疊舛誤况法者天下之

大理非一人之法天下之法也故爲一代不變之制又
准勅立後格合破前格若將開元格與開成格並行實
難檢舉又有太和格五十二卷刑法要錄一十卷格式
律令事類四十卷大中刑法格後勅六十卷共一百六
十一卷久不檢舉伏請定其予奪奉勅宜令御史臺刑
部大理寺同詳定一件格施行者今集衆商量開元格
多定條流公事開成格關於刑獄今欲且使開成格從
之

長興四年六月勅御史中丞龍敏給事中張鵬中書舍人盧道尚書刑部侍郎任贊大理卿李延範等詳定大中統類

清泰二年四月御史中丞盧撰等進清泰元年以前十一年內制勅可久遠施行者凡三百九十四道編爲三十卷其不中選者各令本司封閉不得行用勅付御史臺頒行

晉天福二

一作三

年育中書門下奏伏覩天福元年十月勅

節文唐明宗朝勅命法制仰所在遵行不得改易今諸
司每有公事現執清泰元年十月十四日編勅施行稱
明宗朝勅除編集外並已封鎖不行臣等商量望差官
將編集及封鎖前後勅文並再詳定其經久可行條件
刪錄奏聞從之遂差左諫議大夫薛融秘書監丞呂琦尚
書駕部員外郎知雜事劉皞尚書刑部郎中司徒詡大
理正張仁瑑同參詳至四年七月薛融等上所詳定編
勅三百六十八道分爲三一作十一卷勅令有司刪錄與格

式參用

周廣順元年六月命侍御史盧億等以晉漢及國初事關
刑法勅條一十六件編爲二卷目爲大周續編勅

顯德四年五月二十四日中書門下奏准宣法書行用
多時文意古質條目煩細使人難會兼前後勅格差謬
重疊亦難詳究宜令中書門下並行刪定務從簡要所
貴天下易爲頒行者伏以刑法者御人之銜勒救弊之
斧斤故鞭扑不可一日弛於家刑罰不可一日廢於國

雖堯舜淳古之代亦不能舍此而致理矣命奏制書刪
律令之書求救弊之本經聖賢之損益爲今古之章程
歷代以來謂之彙典朝廷之所行用者律一十二卷律
疏三十卷式二十卷令三十卷開成格一十卷大中統
類一十二卷及皇朝制勅等折獄定刑無出於此律令
則文辭古質看覽者難以詳明格勅則條目煩多檢閱
者或有疑誤加以邊遠之地貪猾之徒緣此爲奸寔以
成弊方屬聖明之運宜申畫一之規所冀民不陷刑官

知所守臣等商量望准聖旨施行仍差侍御史知雜事
張湜太子右庶子劇可久殿中侍御史率汀職方郎中
劉守中倉部郎中王營司封員外郎賈玘太常博士趙
礪國子博士李光贊大理寺正蘓曉太子中允王伸等
十人編集新律勒成簿帙律令之有難解者就文訓釋
勅格之有煩雜者隨事刪除止要諳理省文兼且直書
易會其中有輕重未便當於古而不便於今矛盾相攻
可於此而不可於彼盡宜改正無或牽拘候編集畢日委

御史臺尚書省四品已上官及兩省五品已上官叅詳
可否送中書門下議定奏進取止從之至五年七月七
日中書門下及兵部尚書張昭遠等奏所編集勒成一
部別有目錄凡二十一卷目之為大周刑統伏請頒行
天下與律疏令式通行其刑罰法統類開成編勅等採
掇既盡不在法司行使之限自來自宣令指揮公事三
司臨時條法州縣見今施行不在編集之數應該京百
司公事各有見行條件望令本司刪集送中書門下詳

議奏聞者奉勅依

議刑輕重

後唐天成二年二月十五日御史臺刑部大理寺奏奉天成元年十二月一十日勅越訴之條本防虛妄須行懲斷以絕效尤如或實抱深寃無門上訴其越訴律內不載杖數仍令大理寺別具奏聞者寺司准名例律諸斷罪而無正條若或不經臺省何得復讐事在酌中理難執律其應出律者則舉重以明輕其應入罪者則舉輕以明重疏

云斷罪而無條謂一部律內犯無罪名者准雜律不應
得爲而爲者笞四十謂律令無條理不可爲者事理重
者杖八十疏云雖犯輕重觸雜弘多金科玉條已羅難盡
其在律在令無有正條若不輕重相明無文可以比
附臨時處斷量情爲罪庶補遺闕故立此條其情輕者
笞四十理重者杖八十奉勅宜依

其年七月汝州平恩縣百姓高宏超其父暉爲鄉人王
感所殺宏超挾刃殺感携其首自陳大理寺以故殺論

尚書刑部員外郎李恩夢覆曰伏以挾刃殺人按律處死投獄自首降罪垂文高宏超既遂報讐固不逃法戴天罔愧視死如歸歷代以來事多貸命長慶六年有康買得父憲爲力人張莅乘醉拉憲氣息將絕買得年十四以木錘擊莅後三日致死勅旨康買得尚在童年能知子道雖殺人當死而爲父可哀若從償命之科恐失度情之義宜減死罪處分又元和六年富平人梁悅殺父之仇投縣請罪勅旨復仇殺人固有曩典以其伸冤

請罪自詣公門發於天性本無求生寧死不經特宜減死方今明時有此孝子其高宏超若使須歸極法實慮未契鴻慈奉勅忠孝之道乃治國之大柄典刑之要本誅惡之深文差若毫釐繫之理道昔紀信替主赴難尚青史之永刪今高宏超爲父復仇即刑書之不尚人倫闕法網宜矜可減死一等

長興二年四月大理寺劾可久奏准開成格應盜賊須得本贓然後科罪如有推勘因而致死者以故殺論臣

請起今以後若因而致死無故即請減一等別增病症而死者從辜限正賊減本罪五等中書門下復奏今後凡闕賊徒若推勘因而致死者有故以故殺論無故減一等如拷決因增疾患候驗分明如無他故雖辜內致死亦以減一等論從之至晉天福六年五月十五日尚書刑部員外郎李象奏據刑法統類節文云盜賊未見本賊推勘因而致死者有故者以故殺論其無故者減一等又云今後或有故者以故殺論或無故者其影跡

顯然支証不謬堅持奸惡不招本情以此致死者減故
殺罪三等其或妄被舉引終是平人以此致死者減故
殺罪一等臣按上文云有故殺者以故殺論即此是矣
其無故殺者亦坐減一等罪即恐未當假如官司或有
判獄未見本情不可全不詰問託言有故者則是曾行
拷掠及違令式或粗大勘捧強相抑壓以此致死者並
屬有故無故者即是推勘之司不曾拷掠又不違法律
亦不堅有抑壓此則並屬無故不坐罪假若有犯事人

舊患病疾推勘之際卒暴身亡不可以坐推司減等之
罪又據斷獄律云若依法使杖依數拷決而邂逅致死
者勿論邂逅謂不期致死而死且彼言拷決尚許勿論
此云無故却令坐罪事實相背理有未通請今後推勘
之時致死者若實情無故請依邂逅勿論之義詳定院
奏臣等參詳若違法拷掠即非關托故挾情以致其死
但有情故者依故殺論若雖不依法拷掠即非托故挾
情以致其死而無情故者請減故殺一等若本無情故

又依法拷掠或未拷掠或依詰問未詰問及不抑壓因他故致死並屬邂逅勿論之罪從之

晉天福三年八月大理寺奏左街韓延嗣爲百姓李延暉衝者本街使連喝不住毆擊致死准律鬪毆者原無殺心因鬪毆而殺人者依故殺人者斬其韓延嗣准律合斬准刑法統類節文絞刑決重杖一百處死勅法寺定刑比不因鬪毆故傷人辜內死者以殺人論蓋微相類且非本條罪有可疑法當在宥徒二年半刺面馳華州發運務

收管

定贓

後唐長興四年六月十四日准勅枉法贓十五匹絞准
格加至二十匹乃自喪亂以來廉恥者少舉律行令戒
人遠財國家常切好生上下頗能知禁犯既漸寡法亦宜
輕起今後犯枉法贓者宜准格文處分贓名條內有以
准加減及同字者并倍贓累贓並宜准律令格式處分
凡有告事者除鹽麴條流外宜據輕重依理施行不在

格賞之限

清泰元年九月大理寺奏用法書竊盜條准建中年
贓滿三匹以上決殺不及三匹量情決杖本條量情之
文不定詔御史中丞龍敏等議贓滿三匹准舊法一匹
以上決徒二年半一匹以下量罪以杖大理寺丞又以
量罪之文不定申奏集寺重取今議定贓滿一匹徒二
年半不及一匹徒一年半不得財杖七十從之

二年五月中書門下奏刺史位列公侯縣令爲人父母

祇合倍加乳哺豈可自致瘡痍一昨張宗允胥吏訟論
合當極典法司援律罪止徒流臣聞立法稍嚴則人不敢
犯其見行法律望下所司更加斟酌御史臺刑部大理
寺同議奏准律枉法贓十五匹絞天寶元載加至二十
匹請今後枉法贓十五匹准律絞不枉法贓准三十匹
加徒流受所監臨贓五十匹流二千里今請依統類不
枉法贓過三十匹受所監臨贓過五十匹從之

晉天福五年十月勅今後竊盜贓滿五匹者處死三匹

以上決杖配流以盜論者依律文處分

漢天福十二年八月勅應天下凡闕強盜捉獲不計贓物多少按驗不虛並宜處死

周廣順三年二月中書門下奏今後應犯竊盜賊及和姦者並依晉天福元年以前條制施行應諸處犯罪人等除叛逆外其餘罪並不得籍沒家產及誅骨月一依格令處分請再下明勅頒示天下乃下詔曰赦書節文明有釐革竊慮邊城遠郡未得審詳宜使更明免至舛

誤其盜賊若強盜並准向來格條斷遣其犯竊盜者計
賊絹滿三匹者並准律決殺其絹以本處上估價爲定
不滿三匹者第等決斷應有夫婦人被強姦者男子決
殺婦人不坐其犯和姦者男子婦人並准律科斷罪不
至死其餘姦私准格律處分

論赦宥

晉天福三年二月任散騎常侍張允進駁赦論曰臣聞
管子曰赦者小利而大害久則不勝其禍不赦者小害

而大利久則不勝其福又漢紀云吳漢病篤帝問所欲
言對曰願陛下無為赦旨竊觀自古帝王皆以水旱則
降德音而宥過開狴牢而放囚冀感天心以赦救災者
非也假有二人訟一人有罪一人無罪有罪者見赦則
喜無罪者銜冤銜冤者何踈乎見赦者何親乎如此則
是致災之道非救災之術也小民遇天災則喜皆勸為
惡曰國家好行赦必赦我以救災如此則赦者教民為
惡也且天道福善禍淫若以赦為惡之人而變災為福

則是天助惡民也故曰天降之灾警誠人主豈以濫捨有罪而能救其灾乎是知赦不可行也明矣上深納之

徒流人

後唐清泰三年三月尚書刑部郎中李元龜奏准開成格應斷天下徒流人到所流處本管畫時申御史臺候年月滿日申奏得放還本貫近年凡徒流人所管雖奏不申御史臺報大理寺所以不知放還年月望依格律處分從之

斷屠釣

梁乾化二年四月勅近者星辰失度方在修禳宜令兩京及宋州魏州取此月至五月禁斷屠宰

後唐同光元年十二月十一日勅下凡軍人百姓將牛驢及馬宰殺貨賣今後切要斷除如敢故違即擒捉不問單分高低所在處斬訖奏其本軍指揮使若不切鈐轄致軍內有人違犯別處捉獲亦當取斷天成二年三月勅訪聞京城坊市軍營有故犯條流殺牛賣肉者仰

府縣軍巡嚴加糾察如得所犯人准條科斷如有死牛即令貨賣每斤不得過五文鄉村死牛但報本村節級然後准例納皮曉示天下以此處分

長興二年九月勅其五方見在鷹隼之類並宜就山林解放此後諸色人不得輒有進獻仰閭門使有此色貢奉表章不得引進

三年五月一日勅凡羅網彈射并諸弋獵之具比至冬初並宜止絕若有犯者隨處官吏科違禁之罪起今後每

二月勅便作此勅曉諭中外

五代會要卷九

欽定四庫全書

五代會要卷十

宋 王溥 撰

刑法雜錄

後唐同光三年六月二十一日大理寺奏准獄律諸立春已後秋分已前不得奏決死刑違者徒一年今寺司相次有案牘若准律文候秋分後申奏必慮刑獄延留者詔曰刑以秋冬雖闕惻隱罪多連累翻慮淹延若或

十人之中止於一夫抵死豈可以輕附重禁錮逾時言
念哀矜又難全廢其諸司囚徒罪無輕重並宜各委本
司據罪詳斷輕者即時疏理重者候過立春至秋分然
後行法如關係軍機須行嚴令或謀爲逆惡或蘊蓄奸
邪或行劫殺人難於留滯並不在此限

其年閏十二月二十五日大理少卿魏迥奏此後伏請
指揮天下州府應所禁囚徒不計州縣府巡大小刑獄
委觀察使刺史填送清強判官一員於本廳每月二十

六日兩衙引問明置獄狀細述事端大則盡理推尋小則立限決遣其外縣鎮禁人三日外具事節申本州府仍勘問指揮奉勅宜依

天成元年十一月六日勅應天下刑獄公事訪聞近日多有冤滯自今後每捉到正賊但見賊驗便行正斷不得更追闕連祇証人宿食去處

二年六月十二日大理少卿王爵奏伏惟正觀五年八月二十一日勅極刑雖令即決仍三覆奏在京五覆奏

決前三奏決日兩奏准犯惡逆者一覆奏著於格令又
准建中三年十一月十四日勅應決大辟罪在京者宜
令行決之司三覆奏決前兩奏決日一奏謹按斷獄諸
死罪囚不待覆奏報下而決者流二千里即奏報應決
者聽三日乃行刑若限未滿而行刑者徒一年伏以人
命至重死不再生近年以來全不覆奏或蒙赦宥已被
誅夷伏乞勅下所司應在京有犯極刑者令決前決日
各一覆奏聽進止有凶逆犯軍令者亦許臨時一覆奏

應諸州府乞別降勅命指揮奉勅宜依

二年七月十七日勅節文今後指揮諸道州府凡有推鞠囚
獄案成後逐處委觀察防禦團練軍事判官引所勘囚人面前
錄問如有異同即移司別勘若見本情其前推勘官吏量罪科責
如無異同即于案後別連一狀云所錄問囚人無疑案同轉上本處
觀察團練使刺史有案牘未經錄問不得便令詳斷如防禦團
練刺史州有合申節使公案亦仰本處錄問過即得申送

其年八月十五日少府少監申著瑀奏伏乞指揮諸道

州府此後或顯犯憲章者候文案畢任依格法斷懲如未明事理不得行責情杖從之

其年閏八月勅古者賞以春夏刑以秋冬將賞為之加膳將刑為之不舉樂今朕切于禁暴樂在勸能其或秋後有功不可待冰泮而行賞春時有罪不可候霜降而加刑漸向太平方行古道況賞不僭與則立功者轉多刑不濫施則犯法者漸少其在京或遇行極法日宜不舉樂朕減常膳諸州使遇行極法日亦禁聲樂

長興二年四月二日勅諸道州府各置病囚院仍委隨處長吏加經心或有病囚當時差人診候療理後據所犯輕重決斷如敢故違致病囚負屈身死本官吏並加嚴斷兼每年自夏初至八月未立秋每五日一次差人洗刷枷杻

其年閏五月勅應律令格式六典准舊制令百司各於其間錄出本局公事巨細一一抄寫不得漏落纖毫集成卷軸兼粉壁書在公廳若未有解署者其文書委官

主掌仍每有新授官到令自寫錄一本披尋或因領問之時須知次第仍令御史臺告諭限兩月內抄錄及粉壁書寫須畢其間或有未可便行及曾釐草事件委逐司旋申中書

四年六月大理正張仁瑒奏伏見諸道州府刑殺罪人雖有骨肉尋時不容改瘞皆給喪葬行人載於城外或殘害尸髮多致邀求准獄官令諸大辟罪官給酒食聽親故辭訣宣告犯狀日未後行刑注云決之經宿所司即

爲埋瘞若有親故亦任收葬又條諸囚死無親故者官給棺於官地埋瘞置磚銘於壙內立牌於冢上書姓名請依令指揮從之

其年七月前潞州屯留縣主簿李光鼎獻時務凡當道推刑獄請令於本判官廳前當面責勘據遞到疑狀判官與本司官典同對練候勘鞫了日即將印縫分付本典結案從之

應順元年三月十三日勅令後應三京及諸道州府凡

有刑獄並須據罪斷遣除准初勘鞫及合奏覆外其餘
不得便將案奏擬聞

晉天福三年八月二十六日勅下刑部大理寺御史臺
及三京諸道州府今後或有繫囚染病者並令逐處醫
工看候於公廨錢內量支藥價或事輕者仍許家人看
候所有罪犯合處杖責者仍候痊復日科決

四年九月相州奏管內所獲賊人從來籍沒財產云是
鄴都舊例格律未見明文勅今後凡有賊人准格定罪

不得沒納家資天下諸州准此

五年三月十日勅笏耳稱寃人准大中六年十二月十五日勅若有犯者決杖流配訴雖有理不在申明今後所陳與為勘斷笏耳之罪准律別科

六年五月十五日尚書刑部員外郎李象奏請今後凡是散官不計高低若犯罪不得當贖亦不得上請詳定院覆應内外文武官有品官者自依品官法無品官有散試官者應内外帶職廷臣賓從有功將校等並請同九品官例其

京都軍巡使及諸道州府衙前職員內外雜任鎮將等並請准律不得上請當贖其巡司馬步司判官雖有曾歷品官者亦請同流外職准律杖罪已下依決罰例徒罪已上仍依

當贖法

周顯德五年七月新定刑統今後定罪諸道行軍司馬節度副使副留守准從五品例諸道兩使判

官防禦團練副使准從六品官例節度掌書記防團判官兩藩營田等判官准從七品官例諸道推巡及軍事判官准從八品官例諸軍將校內諸司副供奉官殿直臨時奏聽聖旨

七年十一月二十九日勅宜令四京及諸道州府遇大祭祀正冬寒食立春立夏雨雪未晴已上日並不得行極法如有

已斷下文案可取次日及雨雪定後施行

開運三年十二月十三日詳定院奏今後在京及諸道州府如有准勅決笞杖者差一員公幹清強官監視從之

周廣順元年正月五日赦節文今後應諸色犯罪除反逆罪外並不得沒籍家貲誅及骨肉一依格令處分

三年二月中書門下奏起今後應天下諸道州府斷遣死罪者候斷遣訖錄原案聞奏仍分明錄推司官典及詳斷檢法官姓名具檢用法條朱書不得漏落

顯德元年十月勅應諸司賊盜宜委本府州節度防禦團練等使刺史專切斷除其部內凡有賊盜及逃走軍健諸色亡命之人並須覺察設計差人收拿不計遠近以獲為限應有婚姻鬪競賊盜公事仰逐月長吏躬親鞠問仍令本判官不時提舉疾速區分庶勅命凡有大辟罪斷訖其公案申奏今後仰抄錄要當事節兼于前面朱書罪人入禁至斷了日數奏聞

二年四月五日勅應諸道見禁罪人無家人供給乞食者每

人逐日散官米二升不得任信獄子節給減消罪人口食
仍令不住供給水漿洒掃獄內每五日一度洗刷枷杻如
有病疾者晝時差人看驗醫療

五年七月七日勅州縣自官已下因公事行責情杖量其罪
輕重用不得過臀十五杖因責情杖致死者具事由聞奏
又勅諸盜經斷後仍更行盜前後三犯並曾經官司推
問服罪不問赦前後贓多少並取決殺

歷

逐朝歷名

黃帝起用辛卯歷

顓頊用乙卯歷

虞用戊午歷

夏用丙寅歷

商用甲寅歷

周用丁巳歷

魯用庚子歷

秦用乙卯歷

漢用太初歷

四分歷

三統歷用三本

魏用黃初歷

景初歷用二本

宋用大明歷

元嘉歷用二本

齊用天保歷

同章歷

正象歷用三本

後魏用興和歷

正光歷

正元歷用三本

梁用大同歷

乾象歷

永昌歷三本

後周用天和歷

丙寅歷

明元歷三本

隋用甲子歷

開皇歷

皇極歷

大業歷三本

唐用戊寅歷

麟德歷

神龍歷

大衍歷

元和歷

元和觀象歷

長慶宣明歷

寶應歷

正元歷

景福崇元歷十本

晉天福四年八月司天監馬重績奏曰臣聞爲國者正一氣之元宣萬邦之命受茲歷象以立章程長慶宣明雖氣朔不渝而星躔罕驗景福崇元縱五麗甚正而

年差一日今以宣明氣朔崇元星緯二歷相參方得符合
况自古諸歷皆以天正十一月爲歲首循太古甲子爲
上元積歲彌多差濶之甚臣改定元朔爲新歷一部一
十一卷七章上下經三卷算草二卷立成十二卷取天寶
十四年乙未立爲近元以雨水正月朔爲歲首其所撰
新歷謹詣閣門上進遂命司天少監趙仁錡張文皓秋
官正徐皓文參謀趙延義杜崇龜等以新歷與宣明崇
元考覈得失勅賜號調元歷仍令翰林學士承旨和

疑撰序

周顯德三年八月端明殿學士左散騎常侍權知開封府事王朴奏曰臣聞聖人之作歷也在于知天人之變者也人情之動則可以言知之天道之動則當以數知之數之爲用也聖人以之觀天道焉歲月日時由斯而成陰陽寒暑由斯而節四方之政由斯而行夫爲國家者履端立極必體其元布政考績必同其歲禮動樂舉必正其朔三農百工必授其時五刑九伐必順其氣庶

務有爲必從其日六籍宗之爲大典百王執之爲要道
是以聖人受命必治歷數故得五紀有常受庶徵有常
應正朔行之於天下也自唐而下凡歷數朝亂日失天
垂將百載天之歷數汨陳而已今陛下順效古道寅畏
上天咨詢庶官振舉墜典以臣薄游曲藝嘗涉舊史遂
降述作之命俾究迎推之要雖非能者敢不奉詔是以
包萬象以立法齊七政以立元則圭箭以候氣審朮胸
以定朔明九道以步日校遲疾以推星考黃道之邪正

辨天勢之升降而交蝕詳焉立天之道曰陰與陽各有
數合則化成矣陽之策三十六陰之策二十四奇偶相
合兩陽三陰同得七十二則陰陽之數合七十二者化
成之數也化成則謂之五行之數五之得奇之數過則謂
之氣盈不及謂之朔虛至於應變分明而無所不通所
謂包萬象矣故以七十二爲經法經者常也常用之法
也百者數之節也隨法進退不失舊位故謂之通法以通
法進統法得七十二百謂之統法自元入經先用此法

統厯之諸法也以通法進統法得七十二萬氣朔之下收
分必盡謂之全率以通法進全率得七千二百萬謂之大
率而元統生焉元者歲日月時皆甲子日月五星合在
子正之宿當盈縮先後之中所謂七政齊也古之植圭
於陽城者以其近洛故也蓋尚慊其中乃在洛之東偏
開元十二年遣使天下候影南距林邑國北距橫野軍
中得浚儀之嶽臺應南北弦居地之中皇家建國定都于
梁今樹圭置箭測嶽臺晷漏以爲中數晷漏正則日之

所至氣之所應得之矣日月皆有盈縮日盈月縮則後中而朔月盈日縮則先中而朔自古朏朧之法率皆平行之數入厯既有前後而又衰稍不倫皇極舊術則迂迴而難用降及諸厯則疎遠而多失今以月離朏朧隨厯較定日躔朏朧臨用加減所得者入離定日也一日之中分爲九限逐限損益衰稍有倫朏朧之法所謂審矣赤道者天之絃帶也其數圓而平紀宿度之常數焉黃道者日軌也其半在赤道內半在赤道外去赤道極遠二十四度

當與赤道近則其勢斜當去赤道遠則其勢直當斜則日
行宜遲當直則日行宜速故二分前後加其度二至前
後減其度九道者月軌也其半在黃道內半在黃道外去黃道極
遠六度出黃道謂之正交入黃道謂之中交若正交在
秋分之宿中交在春分之宿則比黃道益斜若正交在
春分之宿中交在秋分之宿則比黃道反直若正交中
交在二至之宿則其勢差斜故較去二至二分遠近以考
斜正乃得加減之數自古雖有九道之說蓋亦知而未

詳空有祖述之文全無推步之用今以黃道一周分爲八節一節之中分爲九道盡七十二道而復使日月二軌無所隱其斜正之勢焉九道之法可謂明矣星之行也遠日而遲近日而速去日極遠勢盡而留自古諸厯分段失實陰陽無准今日行分尚多次日便留自留而退唯用平行仍以入段行度爲入厯之數皆非本理遂至乖戾今較定逐日行分積逐日行分以爲變段於是自疾而漸遲勢盡而留自留而行亦積微而後多別立諸

段變厯以推變差俾諸段變差際會相合星之遲疾可
得而知之矣自古相傳皆謂去交十五度以下則日月
有蝕殊不知日月之相掩與闕虛之相射其理有異焉
今以日月徑度之大小校去交之遠近以黃道之斜正
天勢之升降度仰視旁視之分數則交虧得其實矣乃
以一篇步日一篇步月一篇步星以卦候沒滅為之下
篇都四篇為厯經一卷厯十一卷草三卷顯德三年七
政細行厯一卷臣檢討先代圖籍今古厯書皆無蝕神

首尾之文蓋天竺胡僧之妖說也近自司天卜祝小術不能舉其大體遂為等接之法蓋從假用以求徑捷于是乎交有逆行之數後學者不能詳知便言歷有九曜以為注歷之常式今並削而去之昔在唐堯欽若昊天陛下親降聖謨考歷象日月星辰唐堯之道也其歷謹以顯德欽天為名天道元遠非微臣之所盡知但竭兩端以奉明詔踈略乖謬甘俟罪戾世宗覽之親為製序仍付司天監行用以來年正旦為始自前諸歷皆廢

渾天儀

後唐清泰三年十一月遣司天少監趙仁錡往汴州取

渾天儀

先是梁朝曾造自梁亡留在汴州故司天監何果奏取竟以舊渾天儀損折不能施用

漏刻

晉天福三年二月司天臺奏臣等准漏刻經云漏刻之制起自軒轅所以上揆天時下著人事是故日行有南北晷漏有長短以黃道去極之度而求漏刻自移之變夫中星晝夜一百刻分為十二時每時有八刻三分之

一假令符天以六十分為一刻一時有八刻二十分四刻十分為正前十分四刻為正後二十分為中必為時正上古已來皆依此法自唐室將季黃巢犯京既失舊經漏刻無准伏以見行漏刻自午初四刻元稱巳時巳入未時猶打午正若不改更終成錯誤今欲每時初打一刻至四刻後正時正牌打八刻終一時後一時却從初起即上同往古下驗將來奉勅宜依令本司集寮屬討定奏聞者臣等據諸家歷數及太霄論漏刻等經皆

以晝夜時百刻分為十二時每時有八刻三分之一凡
一時以打一刻起于時初八刻終于時正近取到水秤
較驗方知見行漏刻差誤假令以午時為例從午時五
刻上行作午時一刻浸至未時四刻始滿八刻方終午
時此則午未兩時中各取半合為一時也自日出後至
日入以來時刻皆如此例相侵伏乞改正從時初打一
刻至四刻後進正牌八刻終為一時後時却從初起時
辰自正晷漏無差從之

地震

後唐莊宗同光二年十一月鎮州地震三年十一月二十五日魏府徐泗地大震

明宗天成二年七月鄭州地大震殺二人長興二年六月太原地震自二十五日未時至二十七日申時二十餘度左補闕李祥上疏曰臣聞天地之道以簡易示人鬼神之情以禍福為務王者祥瑞至而不喜災異見而必驚罔不寅畏上元思答天譴臣聞北京地震日數稍

多臣曾覽國書伏見高宗時晉州地震時侍中張行成奏曰天陽也地陰也君陽象臣陰象君宜轉運臣宜安靜今晉州地震彌旬不休將恐女謁用事臣下陰謀且晉州是陛下本封今地震為尤彰其應伏願深思遠慮以杜未萌又開元中秦州地震又差官宣慰兼降使致祭山川所損之家委量事制宜奏聞伏惟陛下中興唐祚起自晉陽地數震于帝鄉理合思于天誠况聖明御宇于今六年歲稔時康人安俗阜臣慮陛下忘創業艱

難之時有成功矜滿之意伏望特委親信兼選勳賢且
徃北京安慰密令巡察問黎民之疾苦嚴山川之祭祀
然後鑒前朝得失之本探歷代聖哲之規崇不諱之風
罷不急之務上深嘉之賜以四品之章服

日蝕

梁太祖一

開平五年正月丙戌朔太史言案前史漢高
祖末年日蝕于歲首上甚惡之於是素服避

正殿命百官各守本司
降勅赦宥罪以答天譴

少帝一

龍德三年十月
辛未朔日蝕

後唐莊宗一

同光二年四月癸亥朔日司
天奏日蝕在卯主歲大旱

明宗五

天成年八月乙酉朔二年八月乙卯朔三年
五月丁丑朔其日陰雲不見百官稱賀長興元

年六月癸巳朔其日陰冥不見至夕大雨二年十一月
甲申朔先是司天計朔日合食二分伏緣所食微少太
陽光影相鑠伏恐不辨虧缺其
日不入閭百官不守司從之

晉高祖四

天福二年正月乙卯朔先是司天奏正月二
日太陽虧蝕宜避正殿開諸門蓋藏兵器是

日太陽虧十分內蝕三分在危室十七度日出東方已
帶蝕三分漸生至卯時復滿三年正月戊申朔司天先
奏其日日蝕至日不蝕內外稱賀四年七月庚子朔中
書門下奏謹案舊禮日有變天子素服避殿太史以所
司救日于社陳五兵五鼓五麾東戟南矛西弩北楯中
央置鼓服從其位百職廢務素服守司重列于廷每等

異位向日而立明復而止今所司法物咸不能具去歲
正旦日蝕惟謹藏兵仗皇帝避正殿素服百官守司今
且欲依舊禮施行從之七年四月甲寅
朔是日百官守司太陽不食上表稱賀

少帝四

天福八年四月戊申朔開運元年九月庚
午朔二年八月甲子朔三年二月壬戌朔

漢隱帝三

乾祐元年六月戊寅朔二年六
月癸酉朔三年十一月甲子朔

周太祖一

廣順二年四
月丙戌朔

月蝕

梁太祖一

開平四年十一月十四日夜先是司天奏是
日月蝕不宜用兵時王景仁方搃大軍北伐

追之不及至五年正月二日
果為唐莊宗大敗于栢鄉

後唐莊宗二

同光三年五月戊申
其年九月甲辰

明宗三

天成三年十二月乙卯
四年六月癸丑
望其年十二月庚戌

少帝二

開運元年三月戊子
其年六月丙戌
蝕

漢高祖一

天福十二年十二月乙未

周世宗二

顯德三年正月戊申
五年十一月辛未

彗孛

梁乾化二年四月甲戌夜彗見于靈臺之西

五月以彗星謫見降

赦宥罪以答天譴

後唐天成三年十月庚午夕西南有孛長丈餘東南指
在宿五度三夕不見

清泰三年九月己丑彗出虛危長尺餘形細微經天壘

哭星

其年十一月廢帝過難
于洛陽晉高祖登極

晉天福六年九月有彗星見丈餘

安重榮建謀舉兵
向關敗于宗城縣

八年十月庚戌夜有彗星見于東方西指尾長一丈在

角九度

其年十二月青
州楊光遠叛命

周顯德三年正月壬戌夜有星孛于參宿其芒指于東

南

五代會要

五代會要

二十

五代會要卷十

欽定四庫全書

五代會要卷十一

宋 王溥 撰

五星凌犯

梁乾化二年五月壬戌夜熒惑犯心大星去心四度順

行

司天奏大星為帝王之星宜修德以答天譴其年六月五日太祖殂

正明四年十二月癸亥鎮星犯文昌上將

唐天祐十五年也是月與

唐兵大戰於胡柳坡唐幽州節度使周德威歿於陣

後唐同光三年九月己亥熒惑在江東犯第一星

是年天下大水

長興四年八月己未夜五鼓三籌熒惑近天高星歲星

近司怪太白近軒轅大星

是年十二月二十六日明宗崩

清泰三年五月丙申夜熒惑歲星犯軒轅又犯大星

其年

降制除晉高祖為邠州節度使晉祖不受詔

晉開運元年十月壬戌夜熒惑犯哭星

司天監趙延義奏元柩鬼方陰

之所治司命哭位生子火猛而代其微也急齋地將有覆敗破家伏法而死其年十二月青州叛帥楊光遠子承勳斬其同謀逆人邠壽等以城降光遠尋亦被誅

漢乾祐二年十一月辛亥夜鎮星始出太微之左掖門

自戊辰歲八月己丑鎮星入太微垣犯上將左右執法內屏謁者勾已往來凡四百四十三日方出左掖

周顯德六年六月十八日熒惑與心大星合度光芒

相射

其月十九日世宗崩先熒惑勾已於房心間凡數月至上臨崩之前一夕與心大星合度是夜

順行

星聚

後唐同光二年八月甲申歲星熒惑合在翼十四度

天成三年九月庚辰鎮星歲星合於箕辛巳太白熒惑

合於軫

晉天福三年四月癸巳夜五鼓三點後太白與鎮星合

太白在鎮星北一寸光芒相接鎮星在婁宿二度順行

黃道內一度太白在婁宿二度順行黃道內一度

宿度在徐

魯之分日辰在荆楚之分

漢天福十二年六月鎮星太白歲星熒惑聚於張

宿占云有

帝王興於周者漢高祖起義兵自平陽趨洛以應之及
隱帝將嗣位又封周王暨周太祖登位以姬姓之後復

繼宗周天人之符乃有所屬

流星

梁乾化元年十二月甲辰夜東方有流星如數升器出
畢宿口受光三文餘有聲如雷

後唐同光三年六月庚寅夜一鼓西南有流星約七十

餘皆有尾迹西南流

其年九月正
簡皇太后崩

長興二年九月丙戌夜二鼓初東北方有小星流入北
斗魁滅至五鼓初西北方次北有流星狀如半升器前
小後大速流入奎滅尾迹凝天屈曲如雲而散光明燭

地又東北有流星如大桃出下台星向西北速流至斗柄第三星旁滅五鼓以後至明中天及四方有小流星百餘流注交橫

清泰元年九月辛丑夜五更初有大星如五斗器西南流尾迹長數丈色赤移時盤屈如龍形感縮如二鐸相闐而散又一星稍小東流有尾迹凝成白氣食頃方散晉天福三年三月壬申夜四鼓後東方有大流星狀如三升器其色白尾迹長二尺餘屈曲流出河鼓星東三

尺東流丈餘滅

周顯德三年正月癸亥五鼓後有大星出南斗僚東北
流丈餘滅

山摧

後唐長興三年七月夔州奏赤甲山崩

水溢

梁開平四年青宋冀亳水詔令本州以省倉粟麥等賑

貸

後唐同光二年十二月中書門下奏今年秋天下州府例有水災百姓所納秋稅請特放加耗從之

三年六月至九月大雨江河決壞民田七月洛水泛漲壞天津橋漂近河廬舍艤舟為渡覆沒者日有之鄴都奏御河漲於石灰窰口開故河道以分水勢鞏縣河決冲住倉廩八月勅如聞天津橋未通往來百官以舟船濟渡因茲傾覆兼踏泥塗自今文武百官可三日一趨朝宰臣即每日中書視事

四年正月勅自京以東幅負千里水潦為沴流亡漸多
宜自今月三日後避正殿減膳撤樂省費以答天譴應
去年經水決霰鄉村有不逮及逃移人戶差科夏秋兩
稅及諸折科委逐處長吏切加點檢並與放免仍一年
內不得雜差遺應在京及諸縣有停住斛斗並令減價
出糶以濟公私如在遵守仰具奏聞

長興三年七月諸州大水宋亳潁尤甚宰臣奏曰今秋
宋州管界水灾最甚人戶流亡粟價暴貴臣等商量請

於本州出斛斗依時價出糶以救貧民兼大水之後頗
且宿麥窮民不辦種子亦望本州據人戶等第支借麥
種自十石至三石候來年收麥據原數却令收納從之
清泰元年九月連雨害稼詔曰久雨不止禮有祈禳崇
都城門三日不止仍祈山川告宗廟社稷宜令太子賓
客李延範等縈諸城門太常卿李懌等告宗廟社稷
晉天福四年七月西京大水伊洛瀍澗皆溢壞天津橋
八月河決博平甘陵大水

六年九月河決於滑州一溉東流居民登邱冢為水所
隔詔所在發舟船以救之兗州濮州界皆為水所漂溺
命鴻臚少卿魏玘將作少監霍廷讓右領衛將軍安璿
右統衛將軍田畷于滑濮澶鄆四州檢河水所害稼并
撫問遭水百姓兗州又奏河水東流濶七十里水勢南
流入沓河及揚州河至七年三月命宋州節度使安彥
威率丁夫塞之河平建碑立廟於河決之所七年四月
詔曰近年已來大河頻決漂蕩戶口妨廢農桑言念蒸

民用茲凋弊凡居牧守皆委山河既在封圻所宜專切
今後宜令沿河廣晉府開封府尹逐處觀察坊衛使刺
吏等並兼河堤使名額任便差選職員分擘勾當有堤
堰怯薄水勢冲注處預先計整不得臨時失於防護

開運元年六月黃河洛河泛溢壞堤堰鄭州原武滎澤
縣界河決

周廣順三年七月暴風雨京師水深二尺壞墻屋不可
勝計諸州皆奏大雨所在河渠泛害稼

三年六月諸州大水襄州漢江泛溢壞羊馬城大城內
水深一丈五尺倉庫漂盡居人溺者甚衆

火

後唐天成四年十一月汝州火燒羽林軍營五百餘間

先是司天奏營惑入羽林
請京師脩火至是應之

長興二年四月汴州封禪寺門上忽有火起沿燒近寺
廬舍相次黎福縣亦火

三年十二月懷州軍營內三處火光自起人至即滅不

焚廬舍

晉天福三年十一月襄州奏火焚居民千餘家

周顯德五年四月吳越王錢宏俶奏十日夜杭州火焚
燒府署殆盡上命中使賈詔恤問

蝗

梁開平元年六月許陳汝蔡潁五州蝻生有野禽羣飛
蔽空食之皆盡

後唐同光三年九月鎮州奏飛蝗害稼

晉天福七年四月山東河南關西諸郡蝗害稼至八年四月天下諸道州飛蝗害稼食草木葉皆盡詔州縣長

吏捕蝗華州節度使楊彥珣雍州節度使趙榮命百姓

捕蝗一斗以祿粟二斗賞之

時蝗旱相繼人民流遷飢者盈路闕西餓草尤甚死

者十有七八朝廷以軍食不充分命使臣諸道括借粟麥晉氏自此衰矣

漢乾祐元年七月青鄆襄齊濮沂密邢曹皆言蠧生開

封府奏陽武雍邱襄邑等縣蝗開封尹侯益遣人以酒

肴致祭尋為鸚鵡食之皆盡

勅禁羅弋鸚鵡以其有吞蝗之異也

二年五月博州奏有蜾生化為蝶飛去宋州奏蝗一夕抱草而死差官祭之復命尚書吏部侍郎段希堯祭東岳太府卿劉皞祭中岳皆慮蟲螟故也

木冰

漢天福十二年十一月二日旦天大昏霧木有冰至十

一日霜露著草皆為冰

時魏府杜重威叛命車駕親征駐蹕城下其月二十七日杜重

威乞降至來年正月二十七日高祖崩

周廣順三年十一月一日雨大冰

其月命宰臣馮道奉迎太廟神主赴東京

新廟是日上親迎神主于西郊
至來年正月十七日太祖崩

雜災變

後唐同光三年九月丁未夜徧天陰雲北方有聲如雷
雉皆雊俗呼曰天狗墜

天成二年二月己酉日中有黑氣狀如雞卵

其年十二月壬辰酉時西南方有赤氣如火燄約二千

里

占者云不出二年
其下當有大兵

應順元年四月九日白虹貫日

是日愍帝遇
弒于衛州

清泰元年十月辛未巳時有雉金色自南飛入中書止于政事堂屋脊上吏驅之不去良久北飛于民家得之

其月僕射平章事李愚罷相守本
官吏部尚書劉昫罷相守右僕射

三年三月有蛇鼠鬥于獅子門外鼠殺蛇

其年晉高祖起
義兵于太原

晉天福二年正月二日夜初北方有赤氣西及亥地東北至丑地南北濶三丈狀如火光赤氣內見紫微宮及北斗諸星至三點後內有白氣數條次行至西夜半子時方散

開運元年正月乙未大霧中有紅白相偶

占者云海淫
所興其將有

戰時車駕在溫
州與契丹相守

其年七月一日改元開運是夜大雷雨明德門內井有

石槽槽有龍首其夕漂川十數步而龍首斲焉

占者云石國姓

也而龍首斲焉大不吉之象晉祚果絕于開運

開運二年正月東京封邱門外石壕內有文若大樹花

葉芬敷之狀相連數十株宛若圖畫

唐景福中盧彥威鎮滄州壕水如此

時有高泥謂州人曰時將不安宜速避之至光化元年果有幽州為劉仁恭所陷

漢乾祐元年三月中書門衛厨釜鳴者七

是月中書侍郎平章事李

濤罷免勒
歸私第

三年正月有狐去明德門樓獲之比常狐毛長腹剩二尺

其年閏五月癸巳京師西北風暴雨至戴委門外壞營

舍凡幾吹鄭門門扉起十餘步落拔大樹數十震死者

六七人平地水深尺餘

其年十一月帝與左右郭永明等同謀大臣楊邠王章史宏肇等至其月二十一日隱帝遇害

周廣順三年六月河南河北諸州旬日無鳥既而聚澤

潞之間山谷中集于林木壓樹枝折

是年人疾疫者甚衆至顯德元年河

東劉崇為周師所敗伏屍流血故先萌其兆

顯德元年三月潞州高平有鵲巢于縣郭之南平地巢
中七八雛

六年二月癸巳有一人敝衣冠闌入中書升政事堂吏
叱之曰爾何人據牀而坐何人遣爾至此其人曰宋州
官家教我來此吏具其事白于宰臣宰臣密令遣之尋

不知所適

其年六月十九日世宗崩
明年正月四日大宋受命

其年六月辛卯辰巳間京師天地晦冥澍雨驟降雨中

有腥氣

是日世宗崩

雜錄

後唐同光二年九月司天奏請禁天下造私曆者從之

周廣順三年八月勅自今後元象器物天文圖書識記七曜

歷太一雷公式法等私家不得有及衷私傳習有者並須焚毀
司天臺翰林院本司職員不得以前代所禁文書出入借人
傳寫其諸時日五行占筮之書不在禁限每年歷日須候本司
再造算奏定方得雕印本司不得衷私示外如是准律科罪

顯德三年八月勅應諸色陰陽占卜書宜令司天臺翰

林院集官詳定其書如是曾經前代聖賢行用合正道者只可存留其有淺近妖妄不依典據者並可毀廢

功臣

梁開平三年十月詔曰太保韓建每月旦十五日入閣稱賀即令赴朝叅餘時弗入見

示優禮也

乾化元年正月勅許昌雄鎮太保韓建朕用之布政民耕盜止久居其位庶可勝殘矣宜令中書門下不計年月勿議替移

後唐同光三年八月內詔冊吳越王錢鏐其印宜以吳越之

天成四年六月勅故平盧軍節度使霍彥威勲名顯著宅兆已營爰遵定謚之規俾議送終之制宜以三公禮葬

長興二年四月詔曰周崇呂望有尚父之榮漢重蕭何有不名之禮錢鏐冠公侯之位疏吳越之封宜示異恩俾當緝禮其錢鏐宜賜不名

其年六月以唐文正公魏徵八代孫韶爲涇州安定縣
主簿

晉天福二年七月以唐忠武公李晟五代孫臧爲將仕
郎耀州司戶參軍

封建

梁開平元年四月封河南節度使馬殷爲楚王五月封
河南尹張全義爲魏王兩浙節度使錢鏐爲吳越王皇
兄依舊守太師政任全昱爲廣王
皇從子友謙爲冀王友諒爲衡王友能

爲惠王友誨爲邵王

二年正月追封皇從子友寧爲安王友倫爲密王五月
封滄州節度使劉守文爲大彭郡王幽州節度使劉守
光爲河間郡王許州節度使馮行襲爲長樂郡王

三年二月追封靈武節度使韓遜爲潁州郡王四月追
封易定節度使王處直爲北平王福建節度使王審知
爲閩王唐州節度使劉隱爲南平王同州節度使劉知
俊爲大彭郡王山東南道節度使楊師厚爲宏農郡王

追封故河中節度使王重榮爲晉王七月進封幽州節度使劉守光爲燕王

四年四月進封廣州節度使劉隱爲南海王追封皇兄存爲朗王六月進封皇伯義方爲潁王皇叔義譚爲韶王

乾化元年五月進封延州節度使高萬興爲渤海郡王二年二月進封故魏博節度使羅宏敬爲趙王

後唐同光元年十一月進封延州節度使高萬興爲北

平王

二年二月改封河南尹判六軍諸衛事張全義爲齊王
三月進封荆南節度使高季興爲南平王四月封夏州
節度使李仁福爲朔方王

天成二年五月封福建節度使王延鈞爲琅琊王六月
封湖南節度使馬殷爲楚國王

三年七月追封僞蜀主王衍爲順正公

以諸侯禮葬

追封福

建節度使王延鈞爲閩王

長興四年二月封東西兩川節度使孟知祥爲蜀王五
月封皇從子從溫爲克王從敏爲涇王從敏爲涇王追
封故夏州節度使李仁福爲虢王七月進封兩浙節度
使錢元瓘爲吳王

應順元年五月封荆南節度使高從誨爲南平王湖南
節度使馬希範爲楚王追封兩浙節度使錢元瓘爲吳
王

清泰二年六月封幽州節度使趙德均爲北平王青州

節度使房知溫為東平王七月封鳳翔節度使李從暉為西平王

晉天福元年十二月追封故東丹王李贊華為燕王

二年五月封魏博節度使范延光為臨清王青州節度使王建立為臨淄王封鳳翔節度使李從暉為岐王十一月進封兩浙節度使錢元瓘為吳王追封故隴西王李嗣昭為韓王

三年四月進封鳳翔節度使李從暉為秦王青州節度

使王建立爲東平王八月進封鄆州節度使范延光爲
高平郡王

五年三月進封昭義節度使王建立爲韓王九月進封
青州節度使揚光遠爲東平王十一月進封福建節度
使王延義爲閩國王

六年正月追封皇弟敬爲通王十一月封兩浙節度使
錢宏俶爲吳越國王

七年正月追封皇弟德爲福王殷爲通王

八年二月追封淄青節度使楊光遠爲壽王

漢天福十二年七月封湖南節度使馬希廣爲楚王十月封魏博節度使高行周爲鄴王七月追封故韓王王建立爲秦王

二年十一月封兩浙節度使錢宏俶母吳氏爲順德夫人

三年十二月追封故順德太夫人吳氏爲恭懿夫人其年八月封兩浙節度使錢宏俶爲嗣吳越國王

周廣順元年正月進封鄆州節度使高行周爲齊王封
山南東道節度使安審琦爲南陽王淄青節度使符彥
卿爲淮陽王夏州節度使李彝殷爲隴西郡王荆南節
度使高保融爲渤海郡王靈武節度使馮暉爲陳留郡王
追封故樞密使楊邠爲宏農郡王故三司使王章爲琅
琊郡王故侍衛親軍馬步軍都指揮使史宏肇爲鄭王
四月追封故許州節度使劉信爲蔡王

二年六月追封故靈武節度使馮暉爲衛王八月追封

故齊王高行周爲秦王

顯德元年正月追封山南東道節度使南陽王安審琦
爲陳王淮南王符彥卿爲衛王渤海郡王高保融爲南
平王隴西郡王李彝殷爲西平王四月追封故中書令
馮道爲瀛王七月進封衛王符彥卿爲魏王六年二月
追封故陳王安審琦爲齊王

雜錄

後唐天成元年七月中書門下奏湖南節度使馬殷封

楚國王禮文不載國王之制請約三公之儀用竹冊從之

封嶽瀆

梁開平元年九月封鎮東軍神祠為崇福侯

從兩浙奏也

其年十一月封福州閩縣玷琦里石廟為昭福祠

從福建奏

也

後唐長興二年七月封故閩越王無諸為富義王

從福建節

度使王延鈞奏也

四年七月封泰山三郎為威雄大將軍

時上不豫劉遂清引泰山僧進

風藥用之小康其僧請封泰山三郎遂從之時以為妖惑之甚

清泰元年六月封吳岳成德公為靈應王

初廢帝在鳳翔將謀入篡

大位潛令人禱吳嶽冀獲資助及即尊位乃詔有司別議尊崇中書門下奏唐天寶十載正月封吳山為成德公與沂山會稽暨巫閭同封至至德二年十二月改吳山為嶽祠享官屬一同五嶽今國家以祈禱靈應宜示殊禮臣等商量請為靈應王從之

其年十一月勅杭州護國廟故封崇德王城隍神改封順義保寧王銅官廟改封福善通靈王湖州城隍神封

阜俗安城王越州城隍封興德保閩王

從兩浙節度使錢元瓘奏也

晉天福二年五月勅青草湖廟安流侯改封廣利公洞

庭湖廟改封靈濟公磊石廟昭靈侯改封威顯公黃陵

二妃懿節廟改封昭烈廟

從湖南節度使馬希範奏也

其年八月勅唐魏國公李靖宜封靈顯王

按史傳鄭州東坡田後魏


孝文皇帝賜僕射李仲顯俗因呼為僕射陵仍立祠廟
宇祀綿遠時俗誤傳為李靖祠明宗征朱守殷經過制
贈太保遣左散騎常侍蕭希甫就行冊命仍立石記於
廟因為唐衛公李靖之祠暨今封王蓋傳習之誤也

七年十月封襄州利市廟為顯正王

漢乾祐三年八月封蒙州城隍神為靈感王

從湖南節度使馬希

範奏也



五代會要卷十一